

REGIONAL NEWS BULLETIN

HEADLINES (MORNING)

Date – 05/11/2025

Time - 7:30 -7:40 Hrs

- Chief Minister Pu Lalduhoma chuan Lai leh Mara te inhumhalhna sixth schedule chu a hlu tak zet a, direct funding te pawh an duhsak a ti.
- India ram pum huap Table Tennis inelna 3rd UTT National Ranking Table Tennis Championship 2025-ah Jeho Himnakulhpuingheta chuan bronze medal a la.
- Champhai District Police atanga thudawn danin, nimin tlai khan ruihhlo tam tak tawlhruknaa in hnamhnawih thin nia ngeia hriat Lalchhuanthangi an man.
- India leh Israel chuan khawvel–a firfiak chi hrang hrang lakah zero tolerance kalpui a nih theih nan an inpekna an nemnghet.

<><><>

CM

Chief Minister Pu Lalduhoma chuan Lai leh Mara te inhumhalhna sixth schedule chu a hlu tak zet a, direct funding te pawh an duhsak a ti.

Nimina Mara Students Organisation (MSO) din champha kum 60-na Diamond Jubilee lawmna Govt. Saiha College Auditorium-a neih a hmanpuinaah he thu hi sawiin, Chief Minister chuan sixth schedule hlut thiam tur leh hmang tangkai tura chahin district council te pawh an hnathawh leh thiltihte a rintlak chuan thuneihna pek belh zel an duh a ti.

Chief Minister chuan zirlaite chu ruihhlo laka fihlim tur leh do tura chahin a zuartute dim lo tura chahin social media te hi a tangkai zawng chauha hmang turin a chah baw k a, An sorkar a hna ruak te tunlaia sipai lam hnaruak te, India ram chhunga thawh tur hna ruak tam tak te leh sumdawnna lam te harh a tanla turin zirlaite chu a chah baw k.

MSO diamond jubilee lawmna khual zahawm CEM Pu M. Laikaw pawhin thusawiin hnam tenau zawkte duhsaktu Chuef Minister an nei chu lawmawm a tih thu a sawi a, MSO te jubilee duhsakna a hlan a, amah pawh term hnih lai president lo ni ve tawh a ni a, ram tana ke an penna leh an thawhnaah an hnungah an awm zel dawn a ni, a ti baw k.

Programme tan hma hian MSO Hqrs office-ah Diamond Jubilee lungphun leh MSO diamond Jubilee Hall chu Chief Minister Pu Lalduhawma hian a hawng baw k.

Mara Students Organization hi kum 1965 November ni 4 khan Shillong khawpuiah din a ni.

<><><>

MLA FUND

Minister of State Pu Lalnghinglova Hmar chuan nimin khan MINECO a a office-ah a bial chhunga school parukte hnenah MLA Fund atangin study tour senso puihna a hlan.

Aizawl West II bialtu MLA hian kumin May thla khan a bial chhunga sawrkar school awmte a tlawh kual a. Hetah hian school lamten an mamawh hrang hrangte thlenin heng zingah hian school thenkhatin study tour leh excursion a chhuahna senso ah puihna an dil. Minister hian senso atana nu leh pate leh zirtirtute thawhkhawm ang zatin a dolet a ni.

MLA Fund atanga puihna dawng school te hi - Govt. Primary School - II, Dinthar; Govt. Middle School, Tuikual North; Govt. Primary School, Kanan; Govt. Middle School Tuikual South; Govt. High School, Dinthar leh Govt. Middle School, Dawrpui Vengthar te an ni a, vawiina a hlan zat hi cheng nuai 3 sing 4 sang 9 leh 940 a ni.

Aizawl West II bialtu MLA chuan, Sawrkar sikul chu dinhmun harsa zawkte luhna a ni tih a sawi a, mi harsa zawkte tanpui an duh avangin a theihdan an ngaihtuah tih sawiin, kumthar a academic session tharah chuan an bial chhunga sawrkar sikul, primary school chin hnuailam zirlai zawng zawngte school uniform pheikhawk a thlawnin an pe vek dawn tih a sawi bawk.

Dinthar Venga awm Govt. Gairigaon Primary School-ah zirtirtu indaih lohna avangin teacher pakhat MLA Fund atangin rawih mek a ni a. Nakkum March thleng ruahmanna awmsa tawhin, senso tur hi cheng nuai 2 leh 25,000 a ni bawk a ni.



BRONZE MEDAL

India ram pum huap Table Tennis inelna 3rd UTT National Ranking Table Tennis Championship 2025-ah Jeho Himnakulhpuingheta chuan bronze medal a la.

Nimin a khelh zawh tak inelna hi Indore-a awm Abhay Prashal Stadium-ah neih niin, Mizo tlangval Jeho-a hi inelna ngaihhlut hlawh ber Men's Singles-ah a inlan a, player 362 inlan zingah bronze medal a vaw chhuak a, Mizoram tan hetiang medal la thei hmasa ber hi a ni.

Jeho-a hian quarterfina-ah Commonwealth Games-a gold medal la tawh Sanil Shetty chu deciding game-ah 11-9 in a hneh. Semifinal-ah National Champion ni tawh Ronit Bhanja nen an inkhel a, 2-4 in a vanduai zawk ni mah se semifinal a thlen avang hian medal a hlawh chhuak tho a ni.

Mizoram Table Tennis Association (MTTA) chuan, Jeho-a thlen chin chu a sangin lawmawm an tih thu an sawi a, tournament lian leh hautak tak maia bronze medal lak theih chu chhinchhiah tlak a nih thu an sawi bawk.



SEIZURE OF DRUG

Champhai District Police atanga thudawn danin, nimin (4.11.2025) tlai khan ruihhlo tam tak tawlhruknaa inhnamhnawih thin nia ngeia hriat Lalchhuanthangi an man.

Champhai District Police tarlan danin, Zokhawthar Police te chuan ni nikum July ni 10 khan Heroin Kg.7.422; Cheng Vaibelchhe 2.22 chuang zet man (Rs. 2,22,66,000) chu Champhai District a Zokhawtharah an man a, hemi kaihnawihah hian mi panga an man tel. Mi panga te hi thubuai siam sak an lo ni tawh a ni.

He thil thleng hi Police ten an chhuina kal zelah Zokhawthar Police te chuan Special Bureau leh Delhi Police puihnain heroin hawng 7.422 an man chungchangah a hotu ber nia hriat Lalchhuanthangi, CH.T.I. tia hriat, kum 50, Delhia cheng thin chu nimintlai dar 4:30 vel khan ah an man ta a ni.

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

GST

Ram chhungah GST 2.0 kalpui a nih hnuah Mizoram sorkarin GST atanga chhiah a hmuh a pung a; GST 2.0 hnuaiah sumdawng engemaw zat lakah complaint lutin, an pawisa chawi tura chhût chu cheng nuai 10 vel a tling tawh.

Taxation department hotute chuan Akashvani News Aizawl zawhna chhangin, kumin September 22 atanga India ram puma GST 2.0 kalpui a nih hnuah Mizoram chuan GST atanga chhiah a hmuh zat a pun thu an sawi a; kumin August thla khan GST-ah cheng vbc 63 point 79 hmuh a ni a, September thlaah ni 22 atangin GST 2.0 kalpui a ni a, hemi thla hian GST cheng vbc 71 point 51 hmuh niin, vbc 7 point 72-in a puang.

GST 2.0 vanga GST rate tlakhniam vangin sorkarin GST a hmuh tur a tlahniam dawn anga sawi a tam thu leh tlahniam tur ni se chuan thla liamta October-ah khan GST hmuh chu tlahniam tawh tur a nih thu Taxation hotute chuan an sawi a; October thla khan GST-ah cheng vbc 76 point 98 hmuh a ni a, September thla aiin vbc 5 point 47-in a pung leh a ni, an ti a, a pun chhoh zel an beisei thu an sawi.

Taxation hotute chuan GST 2.0 hman hnuah dan zawm famkim lo sumdawng an tam thu leh complaint an dawnte an bawhzui nghal zel thu an sawi a; tunah hian sumdawng 100 dawnin GST dan an zawm famkim loh avangin cheng nuai 10 vel penalty chawi tur an neih thu an sawi.

Customer-te hnena pek tur tax invoice pek loh chu sumdawngte'n GST dan an zawm loh thinna tam ber a nih thu leh MGST Section 122 chu hremna an lekhawhna tam ber a nih thu Taxation hotute chuan an sawi.

Mizoram sorkarah thawktu leh lirthei an dil belh mek thu sawiin, dan loa sumdawngte dapchhuah hna te, chhiah pe lo leh chhiah an pek tur ang pe loa sumdawwna lian tak tak kalpuite dapchhuah hnate ngawrh zawka thawh chhoh an tum thu an sawi bawk.

INDIA AND ISRAEL

India leh Israel chuan khawvel—a firfiak chi hrang hrang lakah zero tolerance kalpui a nih theih nan an inpekna an nemnghet leh. Ministry of External Affairs chuan thuchhuah siamin, External Affairs Minister Dr S Jaishankar-a'n ni hnih cham tur India rama rawn zin mek, Israel External Affairs Minister, Gideon Sa'ar nen inbiakna hun an hmang a.

Ministry chuan minister pahnihte chuan India-Israel Strategic Partnership zawng zawng huapzo, rahbi thar chipchiar taka sawidunna an neih thu a sawi. Politics, security, agriculture, trade leh investment, Defence leh mipui thawhhona bakah technology pawimawh leh thar chhuak, semiconductor, cyber security leh AI-a thawhhona kalpui mekte pawh an thlirho tih a sawi bawk.

Israel External Affairs Minister Sa'ar chuan West Asia leh Gulf-a thil thleng chungchangah Israel ngaihdan leh hma a lak dan a sawi bawk a, Dr S Jaishankar

chuan Gaza Peace Plan chu India-in a thlawp thu a sawi ve bawka, mi mante lo kir leh chu lawmawm a tih thu sawiin, Peace Plan nghet tak neih theihna kawng a hawn ngei a beisei thu a sawi bawk. Ram pahnihte hian Sushma Swaraj Institute of Foreign Service leh Ministry of Foreign Affairs of Israel inkara training chungchangah Memorandum of Understanding an ziak bawk a ni.

<><><>